

**Naartunermi, erninermi meeravissiarternermilu sulinngiffeqartarneq pillugu Inatsisartut inatsisaata allanngortinneratigut inuit qitornaminnik, aappaminnik inooqatigisaminnilluunniit toqukkut annaasaqarsimatillugit qaammatit pingasut angullugit aningaasaateqarfimmit akiliunneqarlutik sulinngiffeqarsinnaanissaat anguniarlugu Naalakkersuisut peqquneqarnissaannik Inatsisartut aalajangiiffissaattut siunnersuut. Allanguut UPA2025-mi naammassereersimassaaq.**

*Inatsisartunut ilaasortamit Peter Olsenimit saqqummiunneqartoq*

**pillugu**

**Ilaqutariinnermut Peqqissutsimullu Ataatsimiititaliap**

**siunnersuutip aappassaaneerpeqarnissaanut**

## **ISUMALIUUTISSIISUTAA**

Ataatsimiititaliap suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Anna Wangenheim, Demokraatit, siulittaasup tullia

Inatsisartunut ilaasortaq Doris J. Jensen, Siumut

Inatsisartunut ilaasortaq Dines Mikaelson, Siumut

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Edvard Nielsen Aronsen, Inuit Ataqtigiit, sinniisussaq

Inatsisartunut ilaasortaq Mette Arge- Hammeken, Naleraq

UPA2024-imi 25. april siullermeerinninnerup kingorna siunnersuut ataatsimiititaliap misissorpaa.

### **Siunnersuutip imarisaa siunertaalu**

Siunnersuutip piviusunngortinneratigut Naalakkersuisut naartunermut, erninermut aamma meeravissiarternermut atatillugu sulinngiffeqarnissaq pillugu Inatsisartut inatsisaannik allannguinissamik pisussaaffilerneqassapput, taamaalilluni inuit qitornaminnik, aappaminnik inooqatigisaminnilluunniit toqukkut annaasaqarsimatillugit qaammatit pingasut angullugit aningaasaateqarfimmit akiliunneqarlutik sulinngiffeqarsinnaalissapput. Tamanna inunnut qanigisaminnik annaasaqartunut aliasuumminnik suliarinnissaminnut periarfissamik nutaamik ammaassaaq.

**Siunnersuutip Inatsisartunit siullermeerneqarnera**

Siunnersuut tapersorluarneqarpoq oqallinnermilu qulequttat ilaatigut aningaasaateqarfimmik pilersitsinissaq maannakkullu aliasuummik suliarinninnissamut periarfissap amigaataasarnerat eqqartorneqarput.

Siunnersuut piviusunngortikkumallugu aningaasaateqarfimmik nutaamik tassungalu atasumik inatsimmik nutaamik pilersitsisoqassasoq Naalakkersuisut naliliipput, taamaattumillu allannguutissatut siunnersuut imaattoq siullermeerinninnermi saqqummiullugu:

*”Inatsisartunut aalajangiiffigisassatut siunnersuut: Naalakkersuisut peqquneqassasut inuit qitornaminnik, aappaminnik inoqaatigisaminnilluunniit toqukkut annaasaqarsimatillugit aningaasarsiat annaanagit sulinngiffeqarsinnaanermut aningaasateqarfiliorsinnaanermut inatsisitigut periarfissat qulaajarneqassasut Inatsissamut siunnersuusiortoqarsinnaanera siunertaralugu. Inatsisissatut periarfissat UPA 25-mi saqqumiunneqassapput. Suliami kattuffiit susassaqtartut peqatigalugit suliarineqassaaq.”*

Tamanna tunngavigalugu immikkoortoq ataatsimiititaliamit suliarineqartussanngorlugu innersuunneqarpoq.

**Siunnersuutip aningaasatigut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Taamaalilluni siunnersuutip piviusunngortinnissaani aningaasatigut kingunerisassai siunnersuummut naapertuuttut ataatsimiititaliap maluginiarpaa, taamaalillunilu naatsorsuutigineqarpoq AC-fuldmægtigip ukiup affaani sulinissaanut 250.000 kr.-nit pisariaqartinneqassasut. Tamatuma saniatigut qaammatini pingasuni katillugit 7.885.745.04,- kr.-nit sulinngiffeqarallarnissamut aningaasartuutaanissaat naatsorsuutigineqarpoq.

**Apeqquteqaatit**

Ataatsimiititaliapsiunnersuummik suliaqarnerminut atugassaminik apeqqutit arlallit akineqarnissaat pillugu Isumaginninnermut, Ilaqutariinnermut, Suliffeqarnermut Nunamullu Namminersmut Naalakkersuisoq qinnuigaa. Ataatsimiititaliap apeqquteqaatai akissuteqaatillu assilineri isumaliutisissuummut matumunnga **ilanngussaq 1-itut** kakkionneqarput.

**Ataatsimiititaliap siunnersuummik suliarinninnera**

Siunnersuuteqartup toqusoornermut atatillugu aningaasaateqarfioersup

sulinngiffeqarallarnissamut periarfissat atorneqarnissaanik siunertaa pillugu periarfissaannginnera ataatsimiititaliamit maluginiarneqarpoq. Siunnersuummi siunertaasoq piviusunngortinniarlugu aningaasaateqarfimmik nutaamik inatsimillu nutaamik pilersitsisoqassasoq Naalakkersuisut naliliipput.

Naalakkersuisut allannguutissat siunnersuutaat inuit qitornaminnik, aappaminnik inooqatigisaminnilluunniit annaasaqarsimasut pillugit aningaasaateqarfimmik pilersitsinissamut inatsisitigut periarfissat kattuffiit attuumassutillit suleqatigalugit misissorneqarnissaannik kinguneqassaaq. Tamatuma kingorna inatsisitigut periarfissat UPA2025-imi saqqummiunneqassapput.

Siunnersuuteqartup siunnersuutaqaartumi siunertaarisaa ataatsimiititaliap tamakkiisumik akuersaarpaa, taamaattorli aamma inuit qitornaminnik, aappaminnik inooqatigisaminnilluunniit toqkkut annaasarsimatillugit akissarsiatik annaanagit sulinnngiffeqarnissaannut Naalakkersuisut periarfissanik misissuinissamik siunertaqarnerat tapersorsorlugu.

#### **Ataatsimiititaliap inassuteqaatai**

- Ataatsimiititaliami amerlanerussuteqartut Inuit Ataqatigiinneersut, Siumumeersut aamma Demokaatineersup Naalakkersuisut allannguutissat siunnersuutaat akuersissutigineqassasoq inassutigaat

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

---

Mala Høy Kúko  
Siulittaasoq

---

Anna Wangenheim  
Siulittaasup tullia

---

Doris J. Jensen

---

Dines Mikaelen

---

Mikivsuk Thomassen

---

Edvard Nielsen Aronsen

---

Mette Arqe-Hammeken